



Kamias, 12 Januari 2023

Hosea 2:14-23



Pintun Pengarapaen



Dibata tuhu dem i bas keleng ate. Enggo pe itundalken bangsa Israel IA, lit denga pengalemi dosa, iendik-endikna bangsa e alu cakap si medate. IbabaiNa ku gurun pasir, i ja ia pernah erpadan maka bangsa Israel e jadi bangsaNa ras IA jadi Dibata kalak Israel. IpersingetiNa mulihi perpadanen si enggo pernah ibelaskena. Tutus kal ateNa mpersingetisa gelah bangsa e pe mulihken nginget kai si enggo ibelaskenna. Tambah si e, peken anggur si enggo pernah bana ku ulihken mulihi gelah cukup keperluan geluhna. Kesusahen erkiteken la ras Tuhan salih pagi jadi pintu pengarapen. Arah perbahanen Dibata e, salih min ukur bangsa Israel janah ulihi ikatakenna maka Dibata e perbulangenna.

Selaku perbulangen, Dibata ertanggungjawab nandangi keamanan ras keselamatan ndeharaNa, e maka Dibata erbahan perpadanen ras rubia-rubia bage pe perik-perik gelah ula ganggana bangsa Israel. Rubia-rubia ras perik-perik e simbol bangsa-bangsa isekelewet Israel, gelah ula nggagasi bangsa Israel e, sabap ia sikerajangen Dibata. Kerina alat-alat perang i bas negeri e ipedarat Dibata, janah ipediatna bangsa e nggeluh alu dame. Tuhu, seh kal ertanggungjawabna Dibata nandangi ndeharana, iperdiatekenna kal kai siiperlukenna.

Kata-kata siibelasken Dibata pe tuhu maba kemalemen ate. Ia si itadingken ndeharaNa, IA ka si ngapulisa. Ceda kal nge pusuhNa, tapi teralokensa bangsaNa e uga gia meluatna. Bage me Tuhan e man banta pe. La ipersoalkenna kai si enggo si bahan tapi si ipindokenNa robah kita ras ngikutken sura-suraNa. Nggeluh ku si terulin em pengarapenNa.

Keleng ate si tetap